
ՄԱՐԶՊԱՆԱԿԱՆ ՀԱՅԱՍՏԱՆԻ ԿԱՌԱՎԱՐՄԱՆ ՀԱՄԱԿԱՐԳԸ

ՀԵՆՐԻԿ ԽԱՉԱՏՐՅԱՆ

Արշակունիների հայոց թագավորության անկումից (428 թ.) հետո Հայաստանում հաստատվեց մարզպանական վարչակարգը (428–630-ական թվականներ): Անկախ պետականության կորստով, միջազգային հարաբերություններում Սասանյան Պարսկաստանին ենթակա Մարզպանական Հայաստանը, թեև արդեն ինքնիշխան պետություն չէր, սակայն պարսկական սովորական նահանգ էլ չէր: Եղիշեն հաղորդում է. “Եւ իբրեւս զնա եւս (Արտաշէս Արշակունուն– Հ. Խ.) մերժեաց ի թագաւորութենէն, ի նախարարսն Հայոց անկանէր թագաւորութիւնն. զի թէպէտ եւ զանձն յարքունիս Պարսկաց երթայր, սակայն այրուձին Հայոց բովանդակ ի ձեռն նախարարացն առաջնորդէր ի պատերազմի”¹:

Դատելով պարսից հազարապետ Միհրնէրսեհի՝ Հազկերտ Բ (438/439–457) արքայից արքային ուղղված խոսքերից՝ Հայաստանը տարածաշրջանում պահպանել էր իր կարևոր դերակատարությունը. “...արդ՝ քանի՞ աշխարհք են, որում դուք (պարսից արքան– Հ. Խ.) իշխէք աստուածաբար, եւ զոր սպանանել կամիք իշխէք եւ զորս կեցուցանել: Եւ նախ առաջին՝ որպէս Հայոց մեծ աշխարհն պիտոյ է եւ աւգտակար, եւ առ նմին Վրաց եւ Աղուանիցն ... վասն զի դուք ինքնին գիտէք եւ ամենայն Արիք՝ զաշխարհն Հայոց, թե ո՞րպէս մեծ է եւ պիտանի, եւ մաւտ եւ սահմանակից է կայսեր իշխանութեանն, եւ զաւրէնս եւ պաշտաւն զնոյն ունի, զի կայսր զիշխանութիւն նոցա ունի ... եւ յորժամ Հայք սերտիւ մեր լինին՝ Վիրք եւ Աղուանք այնուհետեւ մեր իսկ են”²:

Թագավորության անկման և կենտրոնական իշխանության չգոյության պայմաններում երկրի ներքին կյանքի տնօրինման գործում կարևոր դեր են կատարում նախարարները և եկեղեցին, քանզի շարունակում էին գործել նախարարական (սովորութային) և եկեղեցական (կանոնական) իրավունքները³: Այսինքն, թեև Սասանյանները Հայաստանում հաստատել էին իրենց վարչակար-

¹ Եղիշէ. Վասն Վարդանայ եւ Հայոց պատերազմին (այսուհետև՝ Եղիշէ).– Մատենագիրք Հայոց, հ. Ա, Ե դար, Անթիլիաս–Լիբանան, 2003, էջ 524:

² Ղ ա զ ա ր Փ ա ր պ ե ց ի. Պատմություն Հայոց (այսուհետև՝ Ղ ա զ ա ր Փ ա ր պ ե ց ի).– Մատենագիրք Հայոց, հ. Բ, Ե դար, Անթիլիաս–Լիբանան, 2003, էջ 2240:

³ Տե՛ս Գ. Ղ ա զ ի ն յ ա ն, Ա. Վ ա ղ ա ր շ յ ա ն. Հայոց իրավունքի պատմության հիմնահարցերը. հին շրջանից մինչև մեր օրերը, Երևան, 2014, էջ 63:

գր, ինչպես նաև փորձում էին երկիրը դարձնել պարսկական սովորական մարզ, սակայն նրանք չհասան իրենց նպատակին, և երկիրը պահպանեց իր ազգային դիմագիծը: Դրա հետևանքով թագավորությանը հաջորդող շրջանի Հայաստանը, իրավամբ, ստացել է “Նախարարական Հայաստան” անվանումը⁴:

Մինչ պետականության կորուստը՝ երկրի գլուխ կանգնած էր “թագաւոր Հայոց մեծաց” տիտղոսը կրող Արշակունի թագավորը⁵: Նա երկրի կառավարումն իրականացնում էր գործակալությունների միջոցով, որոնց ղեկավարները կոչվում էին գործակալներ: Պետական այդ պաշտոնները հիմնականում զբաղեցնում էին ավագ կամ մեծամեծ նախարարները: Երկրի կառավարման մեջ առավել կարևոր էին՝ “հագարապետություն”, “սպարապետություն”, “մարդպետություն”, “թագադիր և թագակապ ասպետություն”, “մադիսագություն”, “մեծ դատավորություն”, “սենեկապետություն”, “շահապ” գործակալությունները: Իսկ բղեշխները, լինելով զինվորական պաշտոնյաներ, իրականացնում էին հայոց թագավորության սահմանների պաշտպանությունը՝ հյուսիսային և հարավային ուղղություններով:

Կային նաև այլ պաշտոններ, որոնք, սակայն, երկրի կառավարման մեջ էական նշանակություն չունեին: Անդրադառնանք Մարզպանական Հայաստանի գործակալություններին:

Մարզպանության մեջ ամենաբարձր պաշտոնյան մարզպանն էր, որը նշանակվում էր պարսից շահնշահի կողմից՝ հանդիսանալով նրա ներկայացուցիչը և երկրի կառավարիչը⁶: Մարզպանը վերահսկում էր տեղական իշխանությունների գործունեությունը, հավաքում հարկերն ու տուրքերը, պահպանում երկրի սահմանները: Նա միջնորդ էր տեղական ազնվականության և պարսից արքայից արքայի միջև⁷, այսինքն՝ ներկայացնում էր Հայաստանն ու նրա շահերը պարսից արքունիքում: Եղիշեի “...ի նախարարսն Հայոց անկանէր թագաւորութիւնն”⁸ հաղորդումից կարելի է եզրակացնել, որ թագավորից հետո երկրում իշխանությունն անցել էր հայ նախարարներին: Նրանց անմիջական գերական (սյուզերենը) արդեն պարսից արքայից արքան էր, քանզի թագավորության անկումով նրան էին անցել ոչ միայն արքունի տիրությունները, այլև՝ Հայոց թագավորի իրավունքները:

⁴ Տե՛ս ն. Ադոնց. Հայաստանը Հուստինիանոսի դարաշրջանում: Քաղաքական կացությունը ըստ նախարարական կարգերի, Երևան, 1987, էջ 240–357:

⁵ Փ ա լ ո ս տ ո ս Բ ո լ գ ա ն դ. Պատմութիւն Հայոց.– Մատենագիրք Հայոց, հ. Ա, Ե դար, էջ 291:

⁶ Э. Хуршудян. Армения и сасанидский Иран (Историко-культурологическое исследование). Алматы, 2003, с. 98–99.

⁷ А. Колесников. О термине «марзбан» в Сасанидском Иране.– «Палестинский сборник», № 27 (Л.), 1981, с. 54–55.

⁸ Եղիշե, էջ 524:

Այսուհետև պարսից արքան էր հաստատում նախարարների գահը, նշանակում գործակալներ, տալիս պատիվներ և ոչ թե՛ մարզպանը:

Գալով իշխանության գլուխ՝ Մասանյանները նախ վերացրեցին Հայոց թագավորությունը, այնուհետև սկսեցին նախարարությունների թուլացման գործընթացը՝ այրուձին դուրս բերելով երկրից: Սկզբնական շրջանում պարսիկները պետք է զգույշ լինեին և, հնարավոր հուզումներից խուսափելու համար, փորձեին սիրաշահել հայ նախարարներին, ինչի հետևանքով էլ երկրի կարևոր գործակալություններն առժամանակ մնացին նրանց ձեռքում, իսկ Վասակ Մյունին, ով սկզբում Վրաց մարզպան էր կարգվել մոտ 437/439–441 թթ., ստանձնեց նաև Հայոց մարզպանի (441–451) պաշտոնը⁹: Դա նաև կապված էր Մասանյանների արտաքին խնդիրների հետ. նրանք Արևելքում պատերազմում էին քուշանների (հեփթաղներ) դեմ¹⁰:

Թագավորության անկումով «թագադիր ասպետություն», «սենեկապետություն» և «շահապ» գործակալությունները վերացան: Սակայն, ընդունված այն կարծիքի համաձայն, թե «մարդպետություն» գործակալությունը տոհմի հետ նույնպես վերացավ¹¹, տեղի ունեցավ հակառակը. պարսից արքունիքն անփոփոխ թողեց մարդպետության պաշտոնը, այն տարբերությամբ միայն, որ դրա կրողներն այսուհետև չէին ներքինացվելու: Այդ պաշտոնը հանձնվեց Արծրունիներին, որոնք սկսեցին կոչվել Մարդպետներ կամ Ռմբոսյաններ, իսկ նրանց ենթակայության տակ գտնվող 15 հազարանոց մարդպետական գունդը, որն ապահովում էր Մարզպանական Հայաստանի ներքին կարգն ու կանոնը, վերջիններիս դարձնում էր երկրում մարզպանից հետո երկրորդ դեմքը¹²:

⁹ Հ. Խ ա չ ա տ ը յ ա ն. Հայոց մարզպանների կառավարման հարցի շուրջ.– ՀՀ ԳԱԱ «Լրաբեր հասարակական գիտությունների», 2017, № 1, էջ 50:

¹⁰ Տե՛ս В. Дмитриев. Всадники в сверкающей броне.– Военное дело Сасанидского Ирана и история римско-персидских войн. СПб., 2008, с. 214.

¹¹ Տե՛ս Ն. Ա դ ո ն ց. ն շ վ. ա շ խ., էջ 354, А. С у к и а с я н. Общественно-политический строй и право Армении в эпоху раннего феодализма (III–IX вв.). Ереван, 1963, с. 297; Վ. Վ ա ը դ ա ն յ ա ն. Արծրունիները հայոց պատմության մեջ, Երևան, 2002, էջ 33–34:

¹² Բ. Հ ա ը ո թ յ ո լ յ ա ն. Արծրունյաց իշխանական ընտանիքը հայոց պատմության մեջ, Երևան, 2016, էջ 81, ն ո լ յ ի՝ Մեծ Հայքի վարչա-քաղաքական բաժանման համակարգն ըստ «Աշխարհացոյց»-ի, Երևան, 2001, էջ 388: Սակայն այս պաշտոնն Արծրունիները տնօրինեցին, հավանաբար, մինչև 484 թ.: Համաձայն Ղազար Փարպեցու հաղորդման՝ ընդատաջելով Վահան Մամիկոնյանի խնդրանքին, պարսից Վաղարշ արքայից արքան Գամսարական նախարարությանը շնորհեց տանուտիրական իշխանություն, իսկ Արծրունիներին՝ ոչ (Ղ ա զ ա ը Փ ա ը պ ե ց ի, էջ 2368–2369): Ինչը կարծել է տալիս, որ «մարդպետ» տիտղոսը ևս չտրվեց Արծրունիներին, որոնք նախ պետք է ապացուցեին իրենց հավատարմությունը պարսից արքունիքին: Իսկ «Գիրք Թղթոց»-ում հանդիպող Ներսես Մարդպետական եպիսկոպոս կամ Գրիգոր սեպհական գնդին եպիսկոպոս ձևերը, ավելի շուտ արտահայտում

“Մպարապետություն”, “հազարապետություն”, “մաղխագություն” և “մեծ դատավորություն” գործակալությունները նույնպես պահպանվեցին: Մասանյանները միտք չունեին վերացնել հայոց գործակալությունները. դա իմաստ էլ չունեի, քանզի հենց նրանց վարչական համակարգը կազմված էր նույն պաշտոնյաներից, որոնք, ճիշտ է, ունեին մասամբ տարբեր և իրավունքների ավելի լայն շրջանակներ¹³: Նրանք վարում էին շատ հեռատես քաղաքականություն. սպարապետությունը թողնելով հայ նախարարներին՝ դրանով ստանում էին իրենց հանդեպ հայերի ստորակայական պարտավորության կատարումը՝ հայոց այրուձին (այրուձիու հիմնական մասը) օգտագործելով քուշանների դեմ պատերազմում, ինչի հետևանքով երկիրը գրկվում էր ռազմական դիմադրություն ցուցաբերելու հնարավորությունից:

Մարզպանական Հայաստանի կառավարման համակարգի հիմնական օղակներն էին՝ “սպարապետություն”, “հազարապետություն”, “մաղխագություն” և “մեծ դատավորություն” գործակալությունները:

1. “Մպարապետությունը” շարունակում էր մնալ Մամիկոնյան տոհմի գործառույթը¹⁴: Մարզպանության սկզբնական շրջանում հայոց զինական ուժը, ինչպես հաղորդում է Եղիշեն, կազմել է մոտ 66.000¹⁵: Ն. Ադոնցը, հիմնվելով Մեբեքուի տեղեկության վրա, գրում է, որ Վահան Մամիկոնյանն ունեցել է 30.000 ընտիր սպառազինված զորք¹⁶, դա տարածելով մարզպանական ամբողջ շրջանի վրա, որով ստացվել է, թե Մարզպանական Հայաստանի զինուժը կազմել է ընդամենը 30.000¹⁷: Մեր կարծիքով այդ մոտեցումն անընդունելի է, և պետք է տարբերակել մինչավարայրյան ու հետավարայրյան շրջանի Հայաստանի կարգավիճակը: Ըստ

են վարչական միավորի իմաստ: Այսինքն՝ Մարդպետական /Մեպիական/ Վասպուրական գնդի եպիսկոպոս, որը վարչական միավորի, տվյալ դեպքում՝ գնդի ներկայացուցիչն էր, որպիսին էր, օրինակ, Տարոնի կամ Սյունյաց եպիսկոպոսը:

¹³ Այս մասին տե՛ս Ծ. Хуршудян. Государственные институты парфянского и сасанидского Ирана (III в. до н. э. – VII в. н. э.). Алматы, 2015.

¹⁴ Եղիշե է, էջ 605, 669, Ղ ա գ ա ր Փ ա ր պ ե ց ի, էջ 2245:

¹⁵ Եղիշե է, էջ 636:

¹⁶ Մեբեքու. Պատմութիւն (այսուհետև՝ Մեբեքու).– Մատենագիրք Հայոց, հ. Դ, է դար, Անթիլիաս–Լիբանան, 2005, էջ 469–470:

¹⁷ Ն. Ադոնց, նշվ. աշխ., էջ 319–320: Չպետք է մոռանալ, որ Եղիշեի նշած 66.000 թիվը վերաբերում է միայն “ուխտապահ նախարարներին”՝ ապստամբության կողմնակիցներին: Բացի այդ, չէ որ հայոց այրուձիու մի մասն Արևելքում էր գտնվում՝ պարտադիր ծառայության մեջ, իսկ, եթե դրան էլ գումարենք Վասակ Սյունու և նրա կողմնակիցների զորքի թիվը, մարզպանական և մարդպետական գնդերը (յուրաքանչյուրը 15 հազար), մաղխագական թիկնապահ գունդը (10 հազար), բերդերում տեղակայված մշտական զորքերը, ապա կստանանք պատկառելի զինուժ:

էության, Վարդան Մամիկոնյանի՝ Ավարայրի ճակատամարտում զոհվելուց հետո՝ մինչև Վահանանց ապստամբությունը, Հայաստանում սպարապետ չկար: 482–505 թթ. սպարապետ էր Վահան Մամիկոնյանը¹⁸: Նրանից հետո որևէ մեկը չի հիշատակվում մինչև Դվինի երկրորդ ժողովը (554/555 թ.)¹⁹, որի վավերաթղթում արձանագրված է «Մամէղ յԱրտուազդան սպարապետ»-ի անունը²⁰:

572 թ. սկսված ապստամբության ժամանակ սպարապետը Վարդան Մամիկոնյանն էր²¹, ով պաշտոնավարեց մոտավորապես մինչև 576/577 թ.²²: Աստղիկի հաղորդումը, որ «Ընդ որ գայրացեալ Վարդանայ բղէշիս որդւոյ Վասակայ, որ էր յազգէն Մամիկոնէից...»²³, առաջացնում է մի քանի հարցադրում. արդյո՞ք պետք է «բղէշի» տիտղոսը հասկանալ սպարապետ իմաստով կամ Վարդանի հայրը՝ Վասակ Մամիկոնյանը, նույնպե՞ս սպարապետ էր, և, վերջապես, բյուզանդական

¹⁸ Հակառակ Կ. Յուզբաշյանի այն կարծիքի, որ Վահան Մամիկոնյանը սպարապետ է եղել 482 թվականից առաջ (տե՛ս Կ. Юзбашьян. Армянские государства эпохи Багратидов и Византия IX–XI вв. М., 1988, с. 13), փաստենք, որ համաձայն Ղազար Փարպեցու՝ «մինչև ինքն իսկ թագաւորն Պերոզ գլխովին ծանեաւ զնա եւ առ լաւս ունէր, եւ յանդիման ամենեցուն զովէր եւ արժանի պատուոյ հաշուէր: Բայց արժանի ըստ նորա իմաստիցն եւ քաջութեանն թէպէտ եւ ածէր զմտաւ պատուէլ զնա, այլ յիշելով զհարցն եւ զնախնեացն նորա զիրս եւ զգործս, որպէս հանապազ ընդդիմութեամբ եւ պատերազմաւ աշխատ կալեալ էր զնոսա՝ յապաղեալ կասէր, եւ լուեալ թագուցանէր զարժան պատիւ տալ նոցա» (Ղազար Փարպեցի, էջ 2307): Պատմիչը Վահան Մամիկոնյանին սպարապետ է կոչում, երբ «Ազդ եղև առ տէրն Բագրատունեաց Սահակ, զոր Հայք եւ զաւրափարն Հայոց Վահան ի ժամանակին յայնմ մարզպան կարգէին Հայոց. ասպետն Սահակ՝ զմարզպանութիւնն, եւ Վահան՝ զտէրութիւնն Մամիկոնէից եւ զսպարապետութիւնն Հայոց» (նույն տեղում, էջ 2316):

¹⁹ Տե՛ս Կ. Մելիքյան. «Narratio de rebus Armeniae» Հայ-քաղկեդոնական երկր վաղ միջնադարյան հայոց եկեղեցու պատմության կարևոր սկզբնաղբյուր, Երևան, 2007, էջ 65–90, նոյն ի՛նչ Հայոց եկեղեցու դիրքն Ընդհանրական քրիստոնեական եկեղեցու համակարգում IV–VI դարի I կեսին, Երևան, 2016, էջ 205: Վ. Վարդանյանը որպէս եկեղեցաժողովի թվական ընդունում է 554 թ. (տե՛ս Վ. Վարդանյան. Հայոց եկեղեցին վաղ միջնադարի քաղաքական խաչուղիներում, Վաղարշապատ, 2005, էջ 242):

²⁰ Ներսէս Բագրեւանդացի.– Ուխտ միաբանութեան Հայոց աշխարհիս ի ձեռն Ներսէսի Հայոց կաթողիկոսի, եւ Մերշապոյ Մամիկոնէից եպիսկոպոսի, եւ Պետրոսի Մինեաց եպիսկոպոսի, եւ այլոց աթոռակցաց, եւ տանուտերանց, եւ ազատաց, եւ համաւրէն ժողովրդականաց.– Մատենագիրք Հայոց, հ. Գ, Զ դար, Անթիլիաս–Լիբանան, 2004, էջ 420:

²¹ Վ. Իսկանյան. Հայ-բյուզանդական հարաբերությունները IV–VII դդ., Երևան, 1991, էջ 249, 302:

²² Վ. Իսկանյանը Խոսրով Անուշիրվանի՝ Հայաստան ձեռնարկած արշավանքը, որն ուղղված էր Վարդան Մամիկոնյանի դեմ, թվագրում է 576 թ. վաղ զարնանը (նույն տեղում, էջ 303). դրանից հետո վերջինիս մասին աղբյուրները լռում են:

²³ Ստեփանոս Տարաւեցի Աստղիկ. Պատմութիւն Տիեզերական (այսուհետև՝ Աստղիկ).– Մատենագիրք Հայոց, հ. ԺԵ, Ժ դար, Երևան, 2011, էջ 691:

պատմիչների հիշատակած Մանվել Մամիկոնյանը, որին սպանել էր Սուրեն մարզպանը²⁴, եղբորից՝ Վարդան Մամիկոնյանից առաջ եղել է սպարապետ: Ցավոք, աղբյուրները մեզ այդ տեղեկությունը չեն տալիս:

591 թ. Հայաստանի երկրորդ բաժանմամբ փոխվում է նաև Հայոց սպարապետի կարգավիճակը: Դեռևս 572 թ. սկսված հայոց ապստամբությունը, այնուհետև դրան հաջորդած պարսկաբյուզանդական պատերազմը, ինչպես հայտնի է, ավարտվեց 591 թ. հաշտության կնքմամբ: Այնուհետև, Մավրիկիոս (Մորիկ) կայսեր (582–602) եկեղեցական ու ռազմավարչական վերափոխումների արդյունքում հայ նախարարների գլխավորությամբ տեղի ունեցան մի քանի ապստամբություններ²⁵, որից հետո՝ 602–628 թթ., պարսկաբյուզանդական նոր պատերազմի վերսկսմամբ երկիրը կրկին դարձավ ռազմական բախումների թատերաբեմ: Եվ Հայոց սպարապետ, որպես Մարզպանական Հայաստանի զինված ուժերի հրամանատար, ինչպիսին էր, օրինակ, VI դ. Վարդան Մամիկոնյանը, արդեն չկար: Նրան փոխարինելու է գալիս այդ շրջանում՝ 591–641 թթ., “գաւրավարն Հայոց”՝ ձևը, որը, ինչ խոսք, օգտագործվում է V դ. հայ մատենագիրների կողմից “սպարապետ” եզրույթին զուգահեռ: Այսինքն, եթե այս ժամանակահատվածի գորավարներին Հայոց սպարապետ համարենք, ապա դա կնշանակի, որ Մարզպանական Հայաստանի սպարապետը նաև Բյուզանդիային անցած հայկական տարածքների, տեղի նախարարությունների սպարապետն էր: Սա թվում է անհավանական, մանավանդ Մավրիկիոսի հայահալած քաղաքականությունից ելնելով, եթե հաշվի առնենք նաև, որ 591 թ. բաժանումից հետո միայն Թեոդորոս Ռշտունուն հաջողվեց վերամիավորել Հայաստանի երկու հատվածները, ապա պատկերը կամբողջանա:

Մերենքը 637 թ. Քաղիսիայի ճակատամարտի մասնակից է հիշատակում Դավթի որդի Սուշեղ Մամիկոնյանին, ով Հայոց գորավար էր²⁶: Հերակլ կայսրին (610–641) հաջորդեց որդին՝ Կոստանդին III-ը (641), իսկ Հայոց աշխարհում գորավար չընտրվեց, որովհետև իշխանները, պառակտվելով իրարից հեռացան²⁷: Նույն կայսրը 641 թ. Թեոդորոս Ռշտունուն սվեց “գաւրավարութիւն՝ հանդերձ պատրկութեան պատուով”²⁸:

²⁴ Վ. Բ ս կ ա ն յ ա ն. նշվ. աշխ., էջ 280:

²⁵ Այս մասին տե՛ս նույն տեղում, էջ 370–416:

²⁶ Մ ե բ է ո ս, էջ 530:

²⁷ Նույն տեղում, էջ 531:

²⁸ Նույն տեղում, էջ 532, Յ ո վ հ ա ն ն է տ Դ ր ա ս ի ա ն ա կ եր տ ց ի. Պատմութիւն Հայոց.– Մատենագիրք Հայոց, հ. ԺԱ, Ժ դար, Անթիլիաս–Լիբանան, 2010, էջ 409, Ա ս ո ղ ի կ, էջ 696:

2. “Հազարապետությունը” ղեկավարում էր Վահան Ամատունին²⁹: Մակայն պարսիկ Ռենշապուհ պաշտոնյան, 447–449 թթ. ընթացքում³⁰ աշխարհագիր անցկացնելով, ոչ միայն ծանրացրեց հարկերն ու եկեղեցին դարձրեց հարկատու, այլև “հազարապետության” ու “մեծ դատավորության” գործակալությունները վերցրեց Վահան Ամատունուց և կաթողիկոսի տեղապահ Հովսեփ Ա Հոդոցմեցուց (439–452) ու հանձնեց պարսիկներին³¹: Ղազար Փարպեցին 482 թ. դեպքերին անդրադառնալիս Վեհվեհնամ պարսիկին հիշատակում է որպես “Հազարապետ Հայոց”³²: Թվում է, թե իսկված գործակալությունները 484 թ. կնքված Նվարսակի պայմանագրով պետք է որ վերականգնվեին, սակայն Բաբգեն Ա Ռթմսեցի (490–516) կաթողիկոսի կողմից հրավիրված Դվինի առաջին՝ 506 թ., ժողովի՝ մեզ հասած երկու վավերաթղթերում էլ հազարապետի պաշտոնով նախարար չի հիշատակվում³³: Դա կարող է նշանակել, որ հազարապետը պարսիկ էր, որին չէին թույլատրել մասնակցել Հայոց եկեղեցաժողովին:

Թեպետ Դվինի առաջին ժողովի վավերաթղթերում թվարկված նախարարների հաջորդականությունից անուղղակի տպավորություն է ստեղծվում, որ հազարապետը Մահակ Կամսարականն էր, քանզի երկու վավերաթղթում էլ վերջինս անմիջապես հաջորդում է Վարդ Մամիկոնյանին³⁴: 553 թ. “Սուրբ Հիզուիբուզիտի վկայաբանության” մեջ հիշատակված է “հազարապետ Հայոց” պաշտոնյան³⁵, սակայն հետաքրքիրն այն է, որ Դվինի երկրորդ ժողովին մասնակից իշխանների շարքում հազարապետը դարձյալ բացակայում է³⁶: Ստեփանոս Ասողիկը հաղորդում է, որ պարսից Խոսրով Ա Անուշիրվան (531–579) արքայից արքան, իր ազգական Սուրեն Ճիհովր-Վշնասպին հանում է Հայոց հազարապետի պաշտոնից և

²⁹ Եղիշե, էջ 544, Մովսէս Խորենացի. Հայոց Պատմութիւն (այսուհետև՝ Մովսէս Խորենացի).– Մատենագիրք Հայոց, հ. Բ, Ե դար, Անթիլիաս–Լիբանան, 2003, էջ 2112–2113:

³⁰ Հ. Հարությունյան. Վարդանանց պատերազմը, Երևան, 1947, էջ 84:

³¹ Եղիշե, էջ 543–544:

³² Ղազար Փարպեցի, էջ 2314:

³³ Բաբգեն կաթողիկոս Ռթմսեցի. Թուղթ Հայոցի Պարսս, առ ուղղափառս [Ա, Բ].– Մատենագիրք Հայոց, հ. Գ, Զ դար, Անթիլիաս–Լիբանան, 2004, էջ 117–124:

³⁴ Առաջին վավերաթղթում՝ “... եւ ի բարեպաշտ պետաց եւ իշխանաց Հայաստան աշխարհիս, որ բերեն զուղղափառ հաւատ յինքեան, Վարդ Մամիկոնեան, Մահակ Կամսարական Արշարունեաց տէր, Սպանդիատ Հայոց ասպետ, Արտաշիր Հայոց մախազ...” (նույն տեղում, էջ 117), և երկրորդում՝ “... եւ յիշխանաց ի Վարդայ Մամիկոնից Տեառնէ եւ ի Հայոց Մարգպանէ, եւ ի Մահակայ Կամսարականէ եւ յԱրտաշրէ Մաղխազէ, եւ յամենայն ազատաց մեծամեծաց եւ փոքունց...” (նույն տեղում, էջ 122):

³⁵ Ներսէս Ռաժիկ. Վկայաբանութիւն սրբոյն Յիզուիբուզտեայ.– Մատենագիրք Հայոց, հ. Գ, Զ դար, էջ 461:

³⁶ Ներսէս Բագրեւանդացի, էջ 420:

կարգում մարզպան³⁷: Այնուհետև պատմիչը շարունակում է՝ գրելով, թե Սուրենի սուսերահար լինելուց հետո արքայից արքան Հայաստանում պարսիկ մարզպան չի կարգում, այլ նախարարների խնդրանքով Հայոց իշխան է հաստատում Դավիթ Սահառունուն, ով Խոսրովի որդու՝ Որմիզդ արքայից արքայի (579–590) հրամանով վարեց հազարապետությունը շուրջ 30 տարի³⁸: Ստեփանոս Ասողիկն իրավացի է այնքանով, որքանով Սուրենից հետո մարզպաններ չեն նշանակվում, քանզի 572 թ. սկսած Հայաստանը պարսկաբյուզանդական պատերազմների ռազմաբեմ էր դարձել: Արդյոք կարե լի է պատմիչի հիշատակած հազարապետությունը հասկանալ մարզպանի իմաստով և Դավիթ Սահառունուն համարել մարզպան: Մեր կարծիքով՝ ոչ, որովհետև, ինչպես նշեցինք, Խոսրովն իր ազգական Սուրենին, հանելով հազարապետի պաշտոնից, կարգում է մարզպան, այսինքն՝ այդ երկու պաշտոնները շփոթել պատմիչը չէր կարող, քանի որ իր շարադրանքում բազմիցս կիրառում է «մարզպան» եզրույթն իր նշանակությամբ:

Է. Դանիելյանը, Դավիթ Սահառունու՝ VII դ. սկզբին մարզպան լինելու հանգամանքը բացատրելով, գտնում է, որ նա VI դ. 80-ական թվականներին Արևելյան Հայաստանում վարել է հազարապետի պաշտոնը³⁹: Նկատենք, որ Ասողիկի «Պատմության»՝ Մ. Մաշտոցի անվան Մատենադարանի թիվ 3502 ձեռագիրն ունի «գաշխարհս» փոխանակ «գհազարապետութիւն» ընթերցումը, որից ստացվում է, թե «Իսկ յետ սուսերահարն լինելոյ Սուրենայ ոչ եւս պարսիկ մարզպան առաքէր ի Հայս թագաւորն Պարսից. այլ ի խնդրոյ նախարարացն իշխան հաստատէ Հայոց գԴավիթ Սահառունի, որ կալաւ գաշխարհս Հայոց ամս Լ հրամանաւ Որմզդի, որդւոյ Խոսրովու Պարսից արքայի»⁴⁰: Այս տեղեկությունը, որն ի դեպ Սեբեոսից քաղագրությունն է, չի կարելի արժանահավատ համարել: Նախ, ինքնին երեսուն տարվա իշխանությունն արդեն իսկ իրատեսական չէ, և երկրորդ՝ այս հաղորդումից ստացվում է, թե Հայոց իշխանը միաժամանակ իրականացրել է նաև հազարապետի գործառույթներ, ինչը հավանական չի թվում: Սա չպետք է շփոթել VII դ. Հայոց իշխանի այն կարգավիճակի հետ, երբ վերջինս երբեմն ստանձնում էր նաև սպարապետի պաշտոնը⁴¹: Բերենք Սեբեոսի տեղեկությունը. «Իսկ թագաւորն առնէ ըստ խնդրոյ իշխանացն գնա (Դավիթ Սահառունուն– Հ. Խ.) իշխան ի վերայ ամենայն աշխարհացն, եւ տայ նմա պատիւ կիրապադատութեանն, եւ հաստատէ գնա ի ծառայութիւն իւր, եւ կալեալ զիշխանութիւնն ամս Գ (երեք տարի– Հ. Խ.) ա-

³⁷ Ա ս ո ղ ի կ, էջ 691:

³⁸ Նույն տեղում, էջ 692:

³⁹ Է. Դանիելյան. Հայաստանի քաղաքական պատմությունը և հայ Առաքելական եկեղեցին (VI–VII դդ.), Երևան, 2000, էջ 146:

⁴⁰ Մ. Մաշտոցի անվան Մատենադարան, № 3502 ձեռագիր (1663 թ.), էջ 260ա:

⁴¹ Հայ ժողովրդի պատմություն, հ. II, Երևան, 1984, էջ 320:

մենայն ճոխությամբ մեծապես⁴²: Մեջբերենք նաև Աստղիկի հաղորդածը. «Իսկ յետ սուսերահարն լինելոյ Սուրենայ ոչ եւս պարսիկ մարզպան առաքէր ի Հայս թագաւորն Պարսից (Խոսրով Անուշիրվանը– Ն. Խ.). այլ ի խնդրոյ նախարարացն իշխան հաստատէ Հայոց զԴաւիթ Սահառունի, որ կալաւ զհազարապետութիւն Հայոց ամս Լ հրամանաւ Որմզդի, որդւոյ Խոսրովու Պարսից արքային⁴³»:

Ինչպէս տեսնում ենք, Աստղիկի մոտ կայսեր փոխարեն հանդես է գալիս պարսից արքան, ով հայ իշխան-նախարարների խնդրանքով Դավիթ Սահառունուն կարգում է Հայոց իշխան: Պատմիչի հիշատակած Հայոց իշխանն այստեղ պետք է հասկանալ կուրոպաղատ իմաստով, որովհետև Հայոց իշխանը կրում էր պատրիկ կամ կուրոպաղատ տիտղոսները⁴⁴: Այսինքն՝ խոսքը VII դ. բյուզանդական Հայաստանում կուրոպաղատ կարգված Դավիթ Սահառունու մասին է և ոչ թե՛ VI դ. Դավիթ Սահառունու, ով, ամենայն հավանականությամբ, պատմական անձ չէր: «Հազարապետություն» պաշտոնի գոյությունը VI դ. վերջին և VII դ. չի բացառվում, քանզի այդ կարևոր գործակալության միջոցով էր իրականացվում երկրի ֆինանսատնտեսական և հարկային հարցերի վերահսկումն ու կարգավորումը:

3. Մարզպանական շրջանում «մաղխազությունը» ևս զբաղեցնում էին Խոռխոռունիները⁴⁵, ովքեր պատասխանատու էին Հայոց մարզպանի անվտանգության համար: 444 թ.⁴⁶ Շահապիվանի եկեղեցածոդովի մասնակիցների շարքում հիշատակված է մաղխազ Վրիվ Խոռխոռունի⁴⁷, ինչը նաև՝ Ղազար Փարպեցու մոտ է⁴⁸: Այնուհետև, Վարդանանց ապստամբության ժամանակ հայոց մաղխազն էր Գադիշո Խոռխոռունին, ով Եղիշեի ու Ղազար Փարպեցու աշխատություններում անվանապես այդպես չէր կոչվում⁴⁹: Սակայն եթե հաշվի առնենք, որ նույն Գադիշոն Վասակ Սյունու կողմնակիցներից էր, ում փոխարեն մի կարճ ժամանակով մաղխազի պաշտոնը ստանձնեց նրա ազգական Խորեն Խոռխոռունի⁵⁰, ապա պարզ է,

⁴² Ս ե բ է ո ս, էջ 527:

⁴³ Ա ս ո ղ ի կ, էջ 692:

⁴⁴ Ա. Տ ե բ - Ղ և ո ն ղ յ ա ն. Հայոց իշխան տիտղոսի ծագումը և Հայոց տերությունը VII դարում.– «Բանբեր Երևանի համալսարանի», 1969, № 1, էջ 243–244:

⁴⁵ Ղ ա գ ա ր Փ ա ր պ ե ց ի, էջ 2308, 2317:

⁴⁶ Կ. Մ ե լ ի ք յ ա ն. Հայոց եկեղեցու դիրքն Ընդհանրական քրիստոնեական եկեղեցու համակարգում IV–VI դարի I կեսին, էջ 165: Վ. Վարդանյանը Շահապիվանի եկեղեցածոդովի թվականն ընդունում է 447 թ. (Վ. Վ ա ր դ ա ն յ ա ն. Հայոց եկեղեցին վաղ միջնադարի քաղաքական խաչուղիներում, էջ 184):

⁴⁷ Կանոնագիրք Հայոց.– Մատենագիրք Հայոց, հ. Է, Ը դար, Անթիլիաս–Լիբանան, 2007, էջ 599:

⁴⁸ Ղ ա գ ա ր Փ ա ր պ ե ց ի, էջ 2242: Ճիշտ է, Փարպեցու մոտ այն Վրիվ ձևով է:

⁴⁹ Ե ղ ի շ է, էջ 567, 627, Ղ ա գ ա ր Փ ա ր պ ե ց ի, էջ 2245, 2263:

⁵⁰ Ղ ա գ ա ր Փ ա ր պ ե ց ի, էջ 2268:

որ Գաղիշոն նս պետք է լիներ մաղխագ: Համաձայն Ղազար Փարպեցու, պարսից արքայից արքա Պերոզի (459–484) օրոք մաղխագ էր նույն Գաղիշո Խոռխոռունին⁵¹: 482 թ. ապստամբության ժամանակ այդ պաշտոնում կարգված էր Գարջոյլ Խոռխոռունին⁵²: Դվինի առաջին ժողովի վավերաթղթում հիշատակված է Արտաշիր Հայոց⁵³, իսկ Դվինի երկրորդ ժողովում՝ Գարջոյր Հայոց մաղխագները⁵⁴: Մինչև 572 թ. ապստամբությունը և դրան հաջորդող շրջանում էլ այս պաշտոնի մասին աղբյուրներում հիշատակություն չենք գտնում: Քանի որ Հայաստանում մարզպան չկար (572 թվականից հետո միայն 628 թ. մարզպան նշանակվեց Վարազտիրոց Բագրատունին), վերանում էր նաև «մաղխագական» գործակալության անհրաժեշտությունը, որը մինչև VI դ. կեսերը ղեկավարում էին Խոռխոռունի նախարարները:

4. «Մեծ դատավորությունը» գտնվում էր Հայոց կաթողիկոսի ձեռքում⁵⁵: Մարզպանական շրջանում մեծանում է Հայոց եկեղեցու դերը՝ ի դեմս կաթողիկոսի: Եկեղեցին՝ որպես արդեն առանձին մի կառույց, սկսել էր ձեռք բերել պետաիրավական գործառույթներ, քանզի «մեծ դատավորի» պաշտոնը կաթողիկոսին օժտում էր պատիժ սահմանելու և այն իրագործելու լիազորությունով⁵⁶: Արշակունյաց շրջանի աշխարհաժողովներին արդեն փոխարինում էին եկեղեցաժողովները, որոնց մասնակցում էին ոչ միայն հոգևորականներ, այլև՝ նախարարներ: Այդպիսով այդտեղ կայացված որոշումները պարտադիր էին դառնում հոգևոր և աշխարհիկ իշխանությունների համար: Երկրի ներքին կյանքում, եթե հիմնական դերակատարը հայ նախարարներն էին, ապա արտաքին հարաբերություններում առաջատարը Հայոց եկեղեցին էր: Հարկ եղած դեպքում կաթողիկոսը՝ որպես երկրի ներկայացուցիչ, բանակցությունների մեջ էր մտնում այլ երկրների տիրակալների հետ՝ ստանալով որոշակի առանձնաշնորհումներ ու կրոնաքաղաքական հանդուրժողականություն⁵⁷:

Մասանյան արքաները, հաշվի առնելով Հայաստանում կաթողիկոսի ազդեցիկ դիրքը, փորձում էին նրան պահել հսկողության տակ և սահմանափակել նրա իրավագործությունները, որի արդյունքում կիրառվեց Հայոց կաթողիկոսին հակաթոռ կարգելու քաղաքականությունը: Մովսես Խորենացին հաղորդում է. «Վասն ո-

⁵¹ Նույն տեղում, էջ 2308:

⁵² Նույն տեղում, էջ 2317:

⁵³ Բ ա բ գ է ն կ ա թ ո ղ ի կ ո ս Ո թ մ ս ե ց ի. նշվ. աշխ., էջ 117, 122:

⁵⁴ Ն ե թ ս է ս Բ ա գ թ ե լ ա ն դ ա ց ի, էջ 420:

⁵⁵ Տ ե ս Ե ղ ի շ է, էջ 544, Ղ ա զ ա թ Փ ա թ պ ե ց ի, էջ 2309–2310:

⁵⁶ Տ ե ս Վ. Վ ա թ դ ա ն յ ա ն. Հայոց եկեղեցին վաղ միջնադարի քաղաքական խաչուղիներում, էջ 185:

⁵⁷ Տ ե ս նույն տեղում, էջ 10:

րոյ հաւանեալ Վռամայ՝ զերկաքանչիւրոցն կատարեաց զխնդիրս, տուեալ յաթոռ եպիսկոպոսապետութեանն զայլ ոմն ասորի, Շամուէլ անուն, զի լիցի ընդդիմափառ մեծին Սահակայ եւ հակառակաթոռ. եւ գործ նմա զատուցանէ զընկերել մարգպանին, կալ ի վերայ բաշխից հարկաց խնդրեցելոց եւ դատաստանաց եւ այլ աշխարհական կարգաց⁵⁸: Ասորի Հայոց կաթողիկոսների վրա Սասանյանների ազդեցությունը, ինչպես հայտնի է, մեծ էր, ու թեև արքան կարող էր Հայոց կաթողիկոսին զրկել գործակալությունից ու կաթողիկոսությունից⁵⁹ (ինչպես դա եղավ Սահակ Պարթևի և Գյուտ Արահեզացու պարագայում) կամ ստեղծել նրան հակաթոռ, այդուհանդերձ, նա շարունակում էր հանդիսանալ հեղինակություն՝ երկրի բախտորոշ հարցերում ունենալով իր գործուն դերը և ժողովրդի համար լինելով հոգևոր հայրապետ:

447–449 թթ. Հազկերտ Բ արքայի հրամանով կաթողիկոսի տեղապահը, փաստացի նույն կաթողիկոսը, զրկվեց “մեծ դատավորի” գործակալությունից, որը, ըստ էության, վերականգնվեց արքայից արքայի դրածոներ՝ Մելիտե (452–456) և Մովսես (456–461) Աղբիանոսյանների օրոք: 461 թ. կաթողիկոս ընտրված Գյուտ Արահեզացին (461–478) նույնպես վարում էր այդ պաշտոնը: 484 թ. Նվարսակի պայմանագրով Եկեղեցին ձեռք բերեց ազատություն, քանզի հաշտության կետերից մեկն էլ վերաբերում էր Հայոց եկեղեցու անկախ կարգավիճակին: Կավադ Ա (488–496 և 498/499–531) արքան, երբ հայերն ապստամբել էին վերջինիս դեմ, հարկադրված էր ճանաչել Հայոց եկեղեցու ինքնուրույնությունը⁶⁰: Իսկ Խոսրով Անուշիրվան արքան, համաձայն Փոռ պատրիարքի հղած թղթի, Հայոց եկեղեցուն (հասկանալի է, որ կաթողիկոսին) վերապահեց Հայոց աշխարհի հարկահանության գործը տնօրինելու իրավունքը⁶¹: Ճիշտ է, օտար տիրակալները միշտ էլ ցանկացել են այս կամ այն կերպ իրենց ազդեցության ոլորտում պահել կամ կախման մեջ գցել Հայոց եկեղեցին (հենց նույն Խոսրով Անուշիրվան արքան փորձեց Դվինում ատրուշան կառուցել և կրկին զրադաշտականություն պարտադրել հայերին), այնուամենայնիվ, որպես երկրի մեջ ինքնուրույն և ինքնատիպ կառույց, հայ նախարարների հետ կարողացավ պահպանել ազգային դիմագիծը՝ մարմնավորելով Հայոց կորսված պետականությունը:

⁵⁸ Մովսես Խոսրեանցի, էջ 2105:

⁵⁹ Նկատենք, որ Հայաստանը, կամենար, թե ոչ, գտնվում էր Պարսկաստանի վարչական կազմում և կաթողիկոսի հաստատումն արքայի կողմից, թեկուզ ձևականորեն, անհրաժեշտ էր: Չնոռանանք, որ նախարարները տանուտիրական իշխանություն էին ստանում և հաստատվում կամ զրկվում հենց պարսից արքայի կողմից:

⁶⁰ Վ. Վարդանյան. Հայոց եկեղեցին վաղ միջնադարի քաղաքական խաչուղիներում, էջ 234:

⁶¹ Նույն տեղում, էջ 255:

Այսպիսով, մարզպանական շրջանի Հայաստանում որոշակի փոփոխություններով պահպանվեց թե՛ Արշակունյաց թագավորության կառավարման համակարգը, այդ թվում՝ նախարարների հողատիրական ժառանգական իրավունքները, թե՛ երկրի կառավարման մեջ նրանց մասնակցությունը (հետագայում այն սահմանափակվեց) և թե՛ Հայոց եկեղեցու կարգավիճակը: Դրա շնորհիվ էլ Հայաստանը պահպանել էր ներքին ինքնավարությունը:

СИСТЕМА ПРАВЛЕНИЯ МАРЗПАНСКОЙ АРМЕНИИ

ГЕНРИК ХАЧАТРЯН

Резюме

После падения династии Аршакуни (428 г.) Армения, хотя не была суверенным государством, но, согласно армянским источникам, сохранила свою внутреннюю автономию в лице нахараров (князья, которые сохранили свои родовые и земельные права) во время марзпанского периода (428–630-е годы), представленного институтами *тысяцкий, главный военачальник, глава отряда телохранителей правителя и великий судья*. В отсутствие центрального правительства Армянская церковь и эти институты выполняли все функции потерянной государственности. Благодаря этому Армения сохранила свою внутреннюю автономию на протяжении всей марзпанской эпохи.

THE GOVERNING SYSTEM OF ARMENIAN MARZPANATE

HENRIK KHACHATRYAN

Summary

After the fall of Arshacid-Arshakuni's dynasty (428), although Armenia was not a sovereign country, nevertheless, according to Armenian sources the country succeeded in preserving nearly intact its native *naxarar* social structure during the *marzpanate* period (the 428s–630s), represented by the institutions of *hazarapet, sparapet, maghkhazh* and the *Great Judge*, which were all occupied by Armenians. In the absence of the central government, the Armenian Church and these institutions embodied and carried out all the duties of the lost government. Thanks to this, Armenia preserved its internal self-governing system throughout the *marzpanate* era.